

Wänn zwa no und hea zing.

Da Paula und die Andl woan zwa ledicha Gschwista und hom ihan Bauanhuf, dän wu sie vo iha Leut übanumma hom, rächt und schlächt beerbat. Sie hom net nea bluß Wießn un Fälla in da A ghobt, sondan die meistn woan dom da Leidn und a boa a auf da lang Meil domma. Und wea was, wu die long Meil licht und wea was, daß dot dom dän Erdbudn zwischn die Schta mitn Vergrößerungsglos sung muß, dea dänkt unwillkürli on-des Gedicht, des wu mia alla in da Schul lerna hom mün: Viel Schteine gabs und wenich Brot!

Wänn auf dän hartn, Schtanin Budn die Küh an ganzn Toch an Pfluch zung hom, noch hot da Paula za Nocht za seina Schwesta gsocht: "Andl, heid homma wieda as Mälkn daschpoat, Die gehmheit ka Tröpfla Milich mea, des sichst o ihra döan Grippn." Wie gsocht, sie hom a klans Zeuch ghobt und hod sie alla zwa und die 3 Kühla rächt und schlächt danead. Und wänn vo denen Küh ana die Scheißn ghobt hod und die ana is zukumma, noch homs net amol mea eischpanna können. Do hedns beino an Pfluch sälba zing mün. Obwohl sie ausa da Bibl und ausan Gebetbuch weida ka Bücha ghobt und glesn hom, hod ma gmant, da Paula wöa bo denan Ausschrüch wua do hod, a richtia Philosoph, wala üba viel siniert und nochgedocht hod.

Wie gsocht, sie hom a klans Zeuch ghobt und damit as Haushaltsgeld gschtimmt hod, hod da Paula im Winda bo die Leut hälftulz ghakt. Ea woa a grußa Schpezialist bom Fichtn fälln. Ea hod su eighakt und nochadla su mit an ümgsägd, daß die Fichtn aufn Zändimeta genau dot no gfalln is, wus da Paula gwöllt hod.

Amol hob ich mit ihm a mordsdrum Fichtn ümgsägd, die host zan Zweit grod nu ümschpanna können. Oba sie hod nea an Fehla ghobt. Die Esta sän bal bis zan Budn ganga.

Wies gleng is, homma alla zwa unna Werk bodrachd. Do hod da Paula sei Kappn ro, sei Plattn gratzt und nochadla hoda gsocht: "Koala, wänn die Esta alla södda Fichtn wöradn, Mänsch gebad des an Berch vulla Bredda."

Su woa da Paula und des hobi bluß dänstweg gsocht, daß ma was, wos da Paula füa a Mänsch woa.

Also do hod da Paula amol wieda mit seina Andl geackad. A Föhra noch da anan homs zung und imma is Wüstareizung, also links rüm. Wis bal dunkl gwoan is, nochad woans grod bo die Ogwända. Do hättns amol rächts rüm ümwändn mün. "Hot," hod da Paula gsocht, "hod rüm!" Die Küh hom a hod rüm gwöllt, oba die Andl hod om Latsalzung, hä si neiglant, daß bal as Sal grissn wöa und wollt pardu die Küh wieda Wüstareizung.

"Hot", hod da Paula wieda gschriea. Die Andl hod oba wieda ohm Latsal Wüstareizung.

Die Küh hom mit die Köpf geschüddld, daß die Schtirnpladdn nea su grachd hom und hom wieda hot gwöllt, su wie iha Herrla hindn om Pfluch as Kommando gehm hod. Doch die Andl und die Küh woan sich net einich.

Do is da Paula grandich gwoan. "Öho", hoda blägd, "Brrr, öho!" Und scho is die ganze Batterie gschtandn. Do hod da Paula Luft ghuld, Tief gschnauft und noch hoda gsocht: "Die Küh hom gwißt, wus no gmüßt hom, oba du net. Heangeng Andl, du bist dümma wie die Küh!"